

四庫全書

史部

欽定四庫全書

史部

硃批諭旨卷五十一

臣 永瑤恭校

編修臣 張謙勳

總校官中書臣 朱 鈐

校對官中書臣 蔣 寬

謄錄監生臣 劉天綸

欽定四庫全書

硃批諭旨卷五十

硃批西琳奏摺

雍正五年十二月十八日西安巡撫臣西琳謹

奏為奏

聞事竊臣於十一月十五日跪請

聖訓荷蒙

教誨周詳

恩逾顧復感激時深遵

旨即於十六日起身是夜宿長新店成時降雪起至次日申時稍止從此由山西直至西安於十六七八等日處處俱降大雪自一尺餘至二尺餘不等來年二麥豐收可必至沿途米價小米每斗價銀自一錢至一錢二三分不等豆子自六分至八分不等麥子自八九分至一錢一二分不等其錢價每銀一兩換大錢九百八九十文至一千一二十文

不等理合繕摺奏

聞謹

奏

深慰朕懷陝省尚未奏報得雪正在憂念之際覽此奏如獲珍寶朕懷釋然矣

雍正六年二月初九日陝西總督臣岳鍾琪西安巡撫臣西琳謹

奏為請

旨事竊照署撫臣張保以撫標遊擊孫王法等詳稱西  
安布政使張廷棟支放官兵俸餉短平緣由具摺  
奏請一案臣西琳面奉

諭旨令臣等確查具奏欽此臣等遵即親審據張廷棟  
供稱向例支放俸餉係面同領餉之員驗過部頒  
法馬逐平彈兌如有平針不對雖分數之間亦必  
補足兌準今雍正五年十月二十三日據各標營  
守備千總黃都等支領十一月俸餉銀兩彈兌之

時面詢該員等有无不足據該員等各云數足遂  
交明領去今以領去之後復言短少委係過手難  
憑等語詢之各營備弁又堅供實係短少臣等隨  
將司庫法馬併各營包分散餉戮子當堂較對查  
十一月係小建每兵一名該餉銀二兩七錢即取  
部頒法馬兌明入戮稱較計重二兩七錢五分是  
每兩該多銀一分八釐有零確係平重戮輕則該  
司之支放並無短少而各該備等之用輕戮分給

顯有剋扣情弊乃前任署撫臣張保不行查明草率具奏甚屬不合查散給俸餉俱係守備經管既有剋扣自應

題叅至於各該營副叅遊擊等員失察之咎亦應叅處但臣等查西安督撫兩標以及火器城守等營之副叅遊擊等官若盡行

題叅革職律擬則九營皆虛一時

題補不得其人仰懇



皇上天恩或將各營失察之副叅遊擊併歷任未久以  
及署事之守備等員暫寬叅處止將久歷營務明  
知平重戡輕之將備據實

題叅以肅法紀臣等未敢擅便伏乞

皇上訓示遵行所有奉

旨交臣等確查緣由理合繕摺奏

聞仰祈

睿鑒謹

奏

既係歷來相沿陋弊猶屬可恕小過姑寬叅處惟當嚴加申飭以戒將來至張廷棟曾經飭諭其諸凡謹慎今於此事雖云無涉其辦理支放時必有不協處以致有此一番嗣後朕或再有所聞斷不輕貸也嚴諭伊知之

西安巡撫臣西琳謹

奏為奏請

聖裁事臣自到任以來細檢案件見竊盜諸案州縣報

到批令緝賊之後在上司竟無片紙行催而州縣亦竟無隻字申覆臣查舊案內有失物甚多者有搶奪傷人者有夥賊衆多者有強竊情形迹涉疑似者乃槩置沉擱揆厥所由或因竊賊照案緝拏例無定限所以彼此漫不經心殊不知安民莫先於弭盜而弭盜最切於清源欲清其源則竊賊烏可不嚴夫竊賊者即大盜之漸其掏摸剪絡鼠竊狗偷之事州縣即行發落必不通報督撫若至通

報必係事不容已勢難隱諱之案則是竊賊一項原有輕重大小之不同若不另定處分槩以竊賊定案則盜風何能止息以臣愚昧之見請嗣後凡有報到盜案查明果係是竊非強照例免叅疎防然竊賊亦不可不定限緝獲未便容其遲緩可否報部立案初限六個月不獲賊者作何定議處分二限四個月不獲賊者又作何定議處分并州縣有前項竊賊不通報上司上司不報部立案者又

如何處分俾各官俱有警惕知竊賊即須緝獲案件不容沉擱似於弭盜安民不無裨益是否可行  
仰祈

睿鑒施行謹

奏

覽奏可見實心任事處諸務咸能似此精勤何有廢弛朕甚嘉悅勉之但此事全在爾等督撫隨宜嚴為勸懲若奉旨議定條例則案件不勝其繁矣且據汝奏中亦

言竊盜原有輕重之不同即此分別輕重其間又滋無限弊端也州縣有司各員之勤敏闇茸爾等苟一留心訪察諒不難辨別倘有遇盜竊等案漫不經心怠惰不理者何事何時不可以指叅耶議定處分之說似可不必然竊盜一事最為民害理當嚴緝亟須申飭屬員勿使稍有怠忽

雍正六年三月二十六日西安巡撫臣西琳謹

奏為奏

聞事竊臣查驛站關係緊要屢檄嚴飭驛傳道金南瑛令其各處查點又一面密委筆帖式千把等四路分查前據驛傳道金南瑛以渭南縣驛馬缺少疲瘦詳揭正思根究確實旋據委查東路之筆帖式佟愛把總李國蘭回稱渭南縣驛馬並未缺額而疲瘦者止有六匹與驛傳道所報迥不相同隨又密遣試用縣丞王名標至渭南縣查點與驛傳道所報符合隨將渭南縣改教知縣尹仕任題請革

職究追將該筆帖式把總等發按察司嚴審有無  
徇情受賄等弊前經

題明在案今據按察司詳稱渭南縣驛馬原係缺少  
疲瘦因佟愛等到驛時兵房馬夫謊稱出差未歸  
及其復回查時乃借民馬影射抵充又將勞傷不  
堪之馬亦不細查填註雖無徇情受賄然難辭疎  
忽之咎詳覆前來臣伏思佟愛李國蘭奉委稽查  
並不實心慎密明係疎縱玩忽不能供職之員已



咨吏兵二部斥革外查臣標額外把總二缺係康熙四十二年恭逢

聖祖仁皇帝西巡將臣標左營領旗金養德張立

特恩用為把總並非為臣標經制而設也理應裁汰今斥革李國蘭之缺應以額外把總徐子茂調補其額外把總之缺不必另補再左營額外把總張其蘊之缺俟該弁缺出并行扣除則冗員省而符經制矣理合繕摺奏

聞謹

奏

可嘉之至事無巨細咸肯如此執法毫不假借方為不負朕之知遇也勉之

同日又

奏為奏

聞事雍正六年正月十四日准宗人府清字來文內開  
署西安將軍富寧安在延信署內書房見有民人

二名道士一名搜有道士牌單修養圖書五星通鑑性理等書其民人一名馮玉供係貢生在延信處教書牌單書修養圖是向東關道清觀金道士處借來看的一名孫永成供係醫生因看馮玉眼疾進署其道士周乙正供向在甘州東山寺出家雲遊至田家灣住因尋貝勒來此等因具奏奉

旨著將馮玉等留在家中情由交與派出審問延信大臣一并嚴審具奏行文該撫將有無別情之處嚴審

具奏該衙門知道欽遵移咨到臣隨傳同按察使碩色拘提馮玉孫永成嚴訊所供俱與宗人府來文無異詢據周乙正供小的是甘州人在東山寺出家因延將軍當日常到寺裏來與我師傅講道所以認得後來師傅死了我朝武當山回來七月裏路過到這裏街上撞著延將軍家人鎖住兒帶進見延將軍與了小的些米就在田家灣八仙庵住下上年十一月初十日又想去化緣進署就被拏

了復夾問周乙正延信常與你師傅講的是什麼  
道你當日說來尋貝勒你尋他做什麼你既認得  
鎖住兒延信家的事你必定知道據供當日師傅  
也沒對小的說講的是什麼道但聽得說是修養  
工夫來尋貝勒實是為化緣的那鎖住兒當日也  
到寺裏來過認得的還認得一個保祿兒他也說  
會講道如今他兩個都到京裏去了別的事實不  
知道等語臣再四嚴審馮玉孫永成周乙正僉供

並無別情而周乙正所供延信家人鎖住兒保祿  
兒俱已回京無憑質訊除將馮玉等仍行監禁外  
伏查此案理應具

題但審無別情合將供情繕摺奏

聞伏候

皇上諭旨遵行謹

奏

覽奏知道了已交承審此事之王大臣存案矣

雍正六年七月二十五日暫署西安將軍印務巡

撫臣西琳謹

奏為恭謝

天恩事臣於本年七月初七日接准兵部咨文荷蒙

皇上特恩命臣暫署西安將軍印務聞

命之下惶悚無地即於本日任事已經遵例

題報外臣自當矢公矢慎刻加勉勵以圖仰報萬一

謹繕摺恭謝

天恩再臣查西安駐防八旗滿洲蒙古漢軍內積有協領叅領佐領防禦驍騎校等共四十一缺自雍正四年延信任內至今未經

題請補放竊思設官分職各有專司員缺何可久懸今臣將協領叅領佐領等缺見在會同副都統臣尼瑪善等於應行補放人員內細加考驗給咨赴部引

見恭候



欽定其防禦驍騎校等缺臣查雍正五年十月內有揀  
選八旗滿洲蒙古漢軍驍騎校領催送部引

見蒙

皇上特放五員外其餘記名應補防禦四十三員應補  
驍騎校一百五十名臣當欽遵

諭旨內名次先後挨次

題補不敢再致因循使員缺久懸也伏乞

皇上睿鑒謹

奏

所奏是補放各員應陸續題奏至一切振作整飭之舉俱可不必爾不過暫行署理遇有令官兵感激之事為之可也朕尚欲命傅爾丹詣陝有與岳鍾琪密商之事且常色禮亦將次到來矣

同日又

奏為奏

聞事臣自到任以來陝省各屬倉庫錢糧徹底清查內

有節年民欠自雍正元年至二三四五等年共未完地丁銀四萬二千九百二十兩零未完本色糧三十六萬二千五百一十四石零臣正在清釐間仰蒙我

皇上特頒

諭旨令各省督撫布政司等因地制宜臣恭繹

聖諭已無微不照隨即斟酌立法通行各屬令其按里按甲逐名確查造冊呈報另委幹員協比如有包

攬抗欠者即令監禁追比至於實在民欠者令其  
勸導輸將迄今數月以來據各屬報到共完銀三  
萬三千五百餘兩共完糧三十三萬九千餘石其  
餘未完銀九千三百餘兩未完糧二萬三千四百  
餘石皆係實欠在民不過零星尾數耳今秋收在  
邇大有可必俟秋成之後則尾欠自可全完矣為  
此謹

奏

覽所奏情形陝省錢糧似易於清楚也朕深為慰悅諸  
凡與岳鍾琪商酌而為之

一查得陝西錢糧無大虧空而倉儲之弊在所  
不免或借存七糶三之說或借以米易穀之故  
那前掩後不無支飾今歲秋收豐稔穀價甚賤  
惟在盤查之官不少假借便可買補足額至於  
甘屬頗聞虧空又寧夏地方有因派軍需而村  
民逃避者遠路傳聞尚未得其確實也

一陝省賊盜甚多在民間者姑無論但就官署而言除本年正月內岐山縣署中失盜已經參出外四月初八日涇陽縣被盜署知縣胡蛟齡帶傷逃脫五月初二日漢中府署被盜又聞先於去年冬曾被偷竊六月內鳳翔府守備署中被盜沔縣知縣署中被盜七月二十八日潼關撫民廳署中被盜八月初七日朝邑縣知縣署中被盜九月內新任西安府知府王紹文赴任

於途中被盜其餘臣未聞知者想亦不少數月之內疊聞盜竊竟視為常事上下隱諱希圖免過乃不知盜風從此而長矣

一陝省官員強半委署朝更暮改重複移調官員皆視為旅次惟交盤之不遑何暇理及民事夫親民之官使之席不暇暖則風俗何由而知政務何從而理臣雖不得與聞實未解其何故也

一巡撫西琳器局褊淺動作乖張不達政務而專好小利每接見屬員有二裁縫旁坐縫衣不起凡地方緊要事務一一聽聞大小官員莫不駭異又前藩司馬喀變價官物凡金珠貴重之件巡撫勒令咸長兩縣交送撫署以至新署咸寧縣知縣張典以馬喀官物不清既無原物又無變價之銀不接前任交代又巡撫有不用之二幕客一姓王薦於臬司碩色一姓鄧薦於糧



鹽道杜濱闔城官員無不唾其鄙陋

一原任咸寧縣知縣胡增瑛去冬領張晟虧空  
案內銀兩買米侵冒銀約四千兩與原任知府  
蔡璉進一美妾互相欺混藩司張廷棟為其所  
愚轉詳巡撫照數准銷今春總督訪知要參巡  
撫竭力庇護蔡璉是以總督止將驛行一事參  
審至今口聲沸騰

一原任潼關撫民同知今陞涼州知府菩薩保

徵收稅銀不照則例額外加倍勒收本年六月  
間潼商道張正瑗提驗底簿該同知以假簿送  
閱張正瑗持簿至省面稟督撫會同藩臬訊明  
不照則例加倍徵收是實額外勒索飯銀是實  
侵匿稅銀四五千兩是實乃遷延日久令該同  
知倒填年月自首銀二千兩上下彌縫和同完  
結臣蒙

皇上面諭各省庇護屬員之習牢不可破觀此乃知

聖明在上無遠不照且由此推之各處侵蝕稅課上司不能查察即查出而有心徇庇者當不止潼關一處為然也

一本年九月二十六日總督自外回署時有一男子持書一封向總督言我師傅教我下山來與公爺投書隨帶進密詢次日又聞會同巡撫臬司密詢其書中情由及如何查詰臣無從知只聞係湖廣人亦未悉其姓名言語可疑情形

金史卷五十一  
卷五十一  
怪異不知曾入

告否臣至微極賤荷蒙

皇上特達之知凡事不敢瞻顧謹就所知據實奏

聞

西琳被人如此叅奏返躬自思何顏立於天地之間耶  
朕所用滿洲外省大臣中多無恥不廉器局狹小其所  
以然之故朕實不解朕閱此奏之後隨於各處訪詢爾  
雖無大貪之處類斯營求小利等事不可枚舉總因汝

出身微賤福量淺薄不克負荷耳滿臣之顏面被爾輩  
一二喪失天良之人壞盡矣朕除愧恨之外復有何諭  
嗣後若不洗滌肺腸痛加悛改身家性命即在眼前非  
但辜負朕一番擢用之恩而已也

雍正六年十一月初九日陝西巡撫臣西琳謹

奏為恭謝

天恩事竊臣齋摺家人回陝荷蒙

恩賜月餅奶酥餅蜜餞荔枝果品各件臣跪迎進署恭

設香案望

闕叩頭謝

恩祇領訖臣自愧庸愚報稱未能日深惶悚荷蒙

聖主垂念微末隨時

賞賚觸目警心感愧無已惟有凜遵

聖訓勉圖仰報萬一為此繕摺恭謝

天恩謹

奏

可惜朕恩悞施於汝輩無恥負恩之徒耳

硃批諭旨卷五十



欽定四庫全書

硃批諭旨卷五十一

硃批法敏奏摺

雍正元年五月十二日直隸巡道臣法敏謹

奏為奏

聞事竊臣至愚極陋才識短淺荷蒙

皇上特恩由內閣侍讀補授禮科掌印給事中毫無寸

效旋授直隸巡道屢次

欽定四庫全書

硃批諭旨

卷五十一

召見荷蒙

天語褒嘉臣何人而遭逢

知遇如此其隆也伏思

畿輔要區幅輳遼濶刑名驛傳關係匪輕臣膺茲重

任益切悚惶惟有勉竭駑駘潔已率屬以仰答我

皇上宵旰靡寧勵精圖治之至意謹將臣到任後以及

辦送

梓宮差竣回署後行過事宜敬為我

皇上陳之

一各屬解審案件去歲因

聖祖仁皇帝升遐停止辦事隨接封印前任巡道宋師曾

俱未審理以致案犯堆積臣甫經到任恭遇辦送

梓宮差務兼值東作方興若再令守候恐致廢時失業當

甚是

不拖累無辜善政也

即詳明巡撫將案內無辜牽連候質人犯概行發

回保候并屍親有情願免解者聽其自便今臣差竣回署後晝夜辦理積案已稍得清楚矣

欽定四庫全書

殊批諭旨

卷五十一

二

一直屬自軍興以來驛站馬匹率多勞疲臣通飭加謹餵養廕壯供應差使今已將廢弛驛務之定興縣知縣程揆揭報在案

好

一訪聞直屬地方每有不法姦民在於村莊立壇設教聚衆斂錢煽惑愚民現在嚴禁查拏

是

一直省風俗設有廟會商賈集場往來雜遝因而流民地棍大開賭場廣招匪類名為進香實為盜數現在出示曉諭并令地方官不時巡查

亟當

嚴禁

是極

一驛站俱設有車輛聞各驛每遇供應差使不敷輒拏民車應用姦胥蠹役即借端漁利額外多拏任意勒索無論行客鄉民羈絆中途甚屬苦累今如遇大差額設車輛不敷飭令給價預雇外其前項弊端現在嚴行禁止

以上數條皆係臣到任後辦理之事謹繕摺備悉奏

聞伏乞

皇上睿鑒謹

奏

覽所奏朕甚嘉悅若更能加勉爾將來可大受朕委任之恩極宜自惜

雍正元年八月初一日直隸巡道臣法敏謹

奏為奏

聞事臣訪有寶坻縣莊頭焦國璧弟兄六人恃富兇橫殘忍不法除同巡撫李維鈞另摺參

奏并現在密訪不法棍徒一有兇橫害民確據即同  
巡撫密叅陸續拏問外查旗人命案向係報部部  
咨一到即飭地方官帶犯赴保會同理事廳審轉  
蓋因州縣官無刑訊旗人之例是以檄令會審原  
其初意乃專指謀故鬪毆殺等重案例應刑訊者  
而言至於自盡命案死係自取既無抵償之條又  
無應加刑訊之人若不分別輕重一例會審非特  
地方官往返需時貽誤公務抑且干連人犯長途

解審拖累堪憐臣愚以為除謀故鬪毆殺等案仍照舊例令其會審外其一切自盡報部命案應令地方官取具確供如情罪供證已明者免其解質止具詳由理事廳核轉其有恃旗狡展者令摘緊要犯證解赴理事廳自行審轉庶案犯得免羈候拖累之苦而地方官亦無往返誤公之虞矣臣曾經申詳巡撫轉請

題達在案合先



奏明伏乞

皇上睿鑒俯允施行謹

奏

此奏甚是傳諭巡撫令其照此具本聲明爾轉詳緣由  
題奏

雍正元年八月二十八日總督倉場戶部右侍郎

臣法敏謹

奏為奏明事竊臣等自通州起身沿河查催糧船於

本月二十七日在馬房地方接讀科臣崔致遠等

條奏內

硃批諭旨欽此欽遵臣前蒙

皇上面諭漕運緊要并詢及今年可否不致凍阻又於  
本月二十日遣侍衛馳問雨澤水勢情形仰見我  
皇上睿慮周詳無時不以漕務為念該臣查得今歲漕  
船因河水淺涸不能依限抵通較之往年已經遲  
滯兩月有餘又因節省腳價一案糧米三日未經

進倉是以倉橋口袋堆至十萬有奇臣惟恐漕船凍阻有誤回空於

諭旨未到以前已令坐糧廳將通州民剥船隻星飛押發楊村一帶地方起剥重載米石又移咨直隸撫臣令其速檄天津通永二道將天津迤南剥船速放過關又嚴飭大通橋監督將堆貯米石勒限盡數入倉即發回口袋又親詣石土兩壩督令坐糧廳嚴飭運役每日儘力起運今口袋已經陸續發

回又公同由水路查催糧船沿途遇有淺阻之處  
即令坐糧廳人役多雇人夫挑挖深通使糧艘遄  
行又檄委東路捕盜同知自通州至河西務一帶  
地方通州右營守備自河西務至天津一帶地方  
專督挖淺庶運務不致遲緩又因今歲糧船到遲  
若不多備口袋則時日有限恐裝載不敷轉運遲  
悞查坐糧廳向有臣等茶果銀兩并該廳應得茶  
果銀兩內動用共置備口袋五萬條以供起卸以

仰副我

皇上慎重漕運恤軍愛民至意再

硃批科臣崔致遠等條奏原摺合併

奏繳謹

奏

覽奏深可嘉獎如此方為實心任事今歲漕艘爾等若能加意料理俾不至阻凍朕自另有恩賚

雍正二年七月十六日總督倉場戶部右侍郎臣

法敏謹

奏為仰體

聖恩一例起剥以便軍民以速漕務事准查倉御史張  
坦麟移稱查漕船遇淺必須起剥向係旗丁雇覓  
而民船因此射利不無刁指是以舊例坐糧廳按  
道里遠近酌量定價截留一應民船令該丁照數  
給銀彼此不得爭執昨至三里屯地方見漕船起  
剥照數給銀而剥米船隻尚無樂從之意訪聞河

西務地方剥米二百石之船徵稅銀一兩二錢又  
有燒酒巷馬頭兩處飯錢加以抵通食用獲利無  
幾故民船常視剥米為畏途也查漕船運載漕糧  
一路關津從無納稅之例即向來衛河以內遇淺  
起剥原係額設之紅剥船至河西務亦無納稅之  
事夫起剥原以速漕今以民剥而令納稅中間自  
多濡滯是欲速漕而反致稽緩矣況各省漕米事  
屬一體今山東粟米起剥現在不納稅銀而南省

粳米校米起剥獨令納稅不無異同之處相應請  
旨敕下直撫速行該管官嗣後漕白剥船隨到隨過一  
例放行不得收納稅銀飯錢庶民船得邀微利而  
漕運亦得迅速矣等因前來臣伏思漕糧關係  
天庾稅務亦關

國課仰懇

皇上敕下直隸撫臣詳加酌議或竟行免其納稅或交  
於通水道在通收納庶無損於



國課而糧運亦無羈遲之弊矣為此繕摺請

旨謹

奏

此一事爾等移咨直隸撫臣會同商酌妥議具奏

雍正二年八月初八日總督倉場戶部右侍郎

臣

法敏謹

奏為奏

聞事本年八月初八日有僧人正修自稱王府替僧求

見臣即令筆帖式問伊住址及來此何事據云僧名四和尚在百齡寺住持係阿哥替僧從五臺歸來有通州經紀張崑山素係相識特來求見請將張崑山放天字號經紀等語查天字號經紀係總理一年運務之役臣等以運務所關不容徇私受賄於去年點放之時令滿漢坐糧廳公擇經紀內身家殷實十餘人臣等當堂闡定以杜夤緣今僧人正修輒敢指名囑託殊駭聽聞理合密

奏請

旨批示遵行謹

奏

王府豈有此等替僧一毫影響全無之事也殊屬大膽  
可惡之極即嚴拏夾訊審明定擬具奏此奏并朕此諭  
皆不必敘入本內

雍正三年七月二十七日湖北巡撫臣法敏謹

奏為奏

聞事竊臣才庸智短荷

皇上厚恩屢

賜拔擢兢兢祇懼惟恐隕越有負職守今復蒙

恩命巡撫湖北臣自到任以來彌切敬畏夙夜不敢自

寧期有以仰副我

皇上牖民成俗治益求治之至意每接見屬員敬將

皇上諄諄訓飭期望內外臣工共相奮勉以襄至治之

聖心反覆開諭凡在屬員咸感激鼓舞但其果能稱職

與否

臣

到任未久未能周知尚容訪察奏

聞至於各處隄工因去年修築高厚今年江漢水勢雖大並無衝決再所屬城垣現在行查其餘一切利弊俱俟細訪確實陸續舉行所有臣到任後已行事宜謹臚列為我

皇上陳之

一楚省百姓向稱剽悍健訟者多每為極小事俱至督撫衙門越告臣出示嚴禁如果有冤枉及告

貪官污吏有贓證者方准呈訴

一查徵收漕糧蝕弊多端州縣家人串通蠹役勒索陋規百般刁難臣出示將諸弊條列通行嚴禁以甦民困

一查湖北地方遼濶耳目難周恐州縣有那新掩舊以致虧空者臣嚴飭司道各府逐一盤查出具印結送臣查考仍細加察訪如有扶同徇隱者一併

題叅

一查各屬所報自盡命案甚多皆因小忿細故輕生有司驗報批審經年累月不能完結拖累實甚臣飭各州縣於檢驗時當場備錄口供如驗無別傷及訊無威逼因姦等情者律得免罪即行省釋報明在案倘有諱命捏飾查出究叅

一各屬俱差家人等在省探聽各上司舉動以圖打點彌縫名曰坐省最為可惡臣已出示嚴行驅

逐矣

一驛站夫馬臣自入境以來見沿途馬匹疲瘦已行驛道通飭嚴查各令餵養臙壯加意整飭矣

一湖北各屬地丁錢糧火耗每兩加一皆民間自封投櫃臣恐有暗加多徵之弊即出示通行曉諭民間並嚴飭各屬無許陽奉陰違

一湖北地方七月內正濕熱交蒸臣到任後監犯報病者不一而足因即轉飭各屬將輕罪人犯查



皇仁

明保候重罪人犯嚴禁獄卒等凌虐以廣

一楚省各衙門鹽規已經革除巡撫向有荆關羨  
餘以作養廉經督臣楊宗仁署篆時將舊日添設  
稅口行查裁革臣到任後除報部稅口外將未經  
裁革之馬家嘴等二十九口亦俱裁革勒石永禁  
矣

以上事宜皆臣到任後所已行者是否允協謹據

實陳

奏伏祈

睿鑒謹

奏

知道了果能照此實力奉行何煩朕多為訓諭耶湖北盜案當嚴加察訪聞多有改強為竊及諱匿不報者亟宜留心毋忽

雍正三年九月初六日湖北巡撫臣法敏謹

奏為恭報秋成事竊照湖北地方目下晚禾收穫已  
遍今據布政使鄭任鑰彙報各屬收成俱有九分  
十分惟沔陽州及南漳縣係濱江之地因江漢水  
漲雖隨即消退其低窪之處收成止有六七分米  
價上米九錢中米八錢下米七錢編氓樂業地方  
寧謐湖南各屬因臣署理督篆據布政使朱綱彙  
報秋成亦俱有八分九分不等茅簷蔭屋之下無  
不歡欣鼓舞感頌

聖恩共樂豐年臣身任地方犬馬私衷倍深歡忭謹具

摺奏

聞仰慰

聖懷謹

奏

閱奏深慰朕懷但類此等奏務須據實直陳毋得絲毫  
粉飾切諭者遇斯

上蒼垂佑豐收之年勸導百姓積蓄乃為第一要政當飭

諭屬員勉力行之不可徒為具文耕三餘一耕九餘三  
慎莫視為迂濶之談也

同日又

奏為奏

聞事竊臣曾將所請事宜具摺奏

聞茲有臣近日續行事件謹臚列為我

皇上陳之

一湖北人文向來稱盛近沐

皇上教養之恩士子益知奮勵誦習頗勤而或苦無指授未得師傳臣查武昌省城舊有江漢書院一所今擬延請品行學問堪為人師者俾之教授使各

屬士子肄業其中量資膏火以仰副我

到任未久遽為此舉不近於沽名釣譽耶業已舉行則皇上振興樂育之至意臣現在舉行俟有就緒另行奏聞已

一普濟堂之設使老疾無依之人得有棲息最為

善舉查雍正二年欽奉

上諭令督撫轉飭有司勸募舉行臣檢閱部文即商之

司道各官皆樂於為善勸諭商民亦皆踴躍從事  
此舉固屬善政但只可勸導樂善良民自為之汝等協  
助則今擬於漢口人煙稠集之處設立普濟堂一所倡  
率資助以推廣  
之人過多至力不足時反令貧民失所也  
聖恩現在舉行俟稍有就緒另行奏

聞

一湖北係通商之地各省商販貨物一到漢口等  
處必落牙行有等姦牙串通光棍誘騙商人貨物

此一

將客本侵吞不給告累遠商為害實甚經臣訪知  
一條當實力奉行乃分內應為之事也  
出示嚴禁并令地方官查拏究追以儆姦牙以恤

遠商

一所在弁兵各有汛防之責約束宜嚴巡緝宜謹

果能臣訪聞各屬有怠於巡防及兵丁之親戚子弟倚  
使其不蹈前轍乃大有益於國家生民之事也勉  
藉營勢強買強賣滋擾百姓者臣嚴飭所屬文武  
為之

官弁加意約束不得復蹈前轍以期弭盜安民

一武昌漢陽等處有慣作私媒哄賣民間子女者



應嚴

行查禁

又有湖南拐子潛匿城市誘拐人家子女販賣遠

方使人骨肉分離最為可惡臣已出示嚴禁并檄行各屬密訪查拏矣

一湖北社倉一事曾經前任督撫通行各屬在案臣恐有司奉行不善或致擾民因轉行布政司通

飭令將已經捐設者造冊申報其未經舉行之州此當實心勸導為之斷不可稍脇以威惟善於鼓舞方縣值此豐年務期實力奉行多方勸導但不得抑

能有成也

勒派擾倘有官役借端生事定即指名叅究

以上諸條係臣近日所行事宜謹據實奏

聞伏乞

睿鑒謹

奏

所奏俱悉

同日又

奏為奏

聞事竊照新任督臣李成龍奉

旨著令速行赴任臣於九月初二日准到部文因念安徽入湖北境甚近遂於初三日委員送印已經具

知道了疏

題報矣再廣東撫臣楊文乾於本月初三日到武昌擬於二十內扶櫬由水路起程臣謹奏

聞謹

奏

朕已有旨著楊文乾在任守制矣但伊何到武昌如此

迅速耶

雍正三年九月二十一日湖北巡撫臣法敏謹

奏為欽奉

上諭事臣於本年九月初八日接到

硃批奏摺臣跪讀之下仰見我

皇上軫念地方弭盜安民之至意竊查湖北界連河南

陝西四川江南江西湖南各省多係濱江負山之

處匪類易於潛藏如八吉堡歸州東江腦池野湖

樊城等處皆向稱盜賊出沒之所經臣訪知即通飭各屬實心巡察防禦在案今欽奉

聖諭

臣

凜遵再行嚴飭水陸各處文武力行保甲上緊

巡查遇有盜案即據實通報嚴緝務獲不得仍前瞻顧疎縱任意改諱臣仍留心查察一有改諱情弊即指名

題叅以懲不職以戢盜風謹

奏

爾等若不懲戒不職屬員朕自必懲戒不職督撫提鎮也地方文武大臣當和衷竭力勉為之慎毋藉諉隣省虛應故事保甲之法最善各省奉行率皆有名無實此一法若能實力行之即可以弭盜也嚴捕緝以靖盜賊尤宜嚴查窩家更為清盜源之良策也勉為之

雍正三年十月十五日湖北巡撫臣法敏謹

奏為恭謝

天恩事

臣

齎摺家人恭捧

皇上賞

臣

哈密瓜到楚

臣

隨恭迎至署望

闕叩頭祇領訖伏念

臣

受

恩至重屢蒙

異數今復叨

天恩賜以

上方珍味

臣

不勝感激謹具摺

奏謝為此謹

奏

覽爾奏謝知道了

遇朕施恩切母因此高興放恣或遇朕訓責亦不必驚惶失措信朕之賞與罰總不如信已之是與非也凡百爾果克盡臣節朕自能全君道如此自省自求則君臣交孚倚信之情在其中矣內外諸臣咸能孤介自持秉公除私惟求合於天下後世公論行去何慮庶務不理耶勉之勉之將此諭亦與李成龍看

雍正三年十月二十七日湖北巡撫臣法敏謹



奏為恭謝

天恩事竊

臣

至愚極陋荷蒙

皇上厚恩畀以封疆重任每次奏摺仰蒙

皇上詳加批示

臣

跪讀之下如對

天顏親聆

訓誨知所遵循不勝感激近督

臣

李成龍奏摺欽奉

硃批復令諭臣知悉臣叩頭捧讀仰見

聖心諄切期望

臣

等勉勵向上之意至深且厚臣雖愚

昧敢不銘諸肺腑竭盡微忱惟有敬奉

訓旨時刻提撕警覺以圖上報

皇上訓勉盛心耳

臣感戴

天恩繕摺

奏謝謹

奏

頃命布蘭泰巡撫湖南矣爾等三人可同心協力整理  
地方安輯兵民黽勉毋懈

同日又

奏為奏

聞事竊照湖北地方今歲收成俱極豐足惟沔陽一州  
向稱窪下本年九月內因江水陡發晚禾被淹經  
臣委員勘明成災分數具

題在案所有災黎宜加賑卹臣暨督臣與司道等官  
酌議現在公同辦買米石發往該州於四鄉適中  
之地分設棚廠煮粥施賑至明年正月底止務使

窮簷老幼皆得就近赴食不致流離失所以仰慰  
我

皇上軫念民生惟恐一夫不獲之至意為此具摺奏  
聞謹

奏

此等事須當實力辦理勤為訪察萬不可被屬員下役  
之所欺蔽勉之

雍正三年十二月二十八日湖北巡撫臣法敏謹

奏為恭謝

天恩事竊臣疊受

聖恩毫無報稱方切感愧今又蒙

天恩調補四川巡撫巖疆要地關係尤重臣材質愚鈍

惟恐不能勝任有負

聖恩不勝惶悚惟有誓竭駑駘勉圖報效以期仰答

高厚於萬一耳除恭疏具

題外謹具摺

奏謝再湖北地方本月十三日得雪尺許二十四五等日又得雪七八寸不等明年二麥豐收可必萬姓稱慶感頌

皇恩合併奏

聞謹

奏

湖北如此大雪實不易得朕懷深慰

雍正四年三月十七日四川巡撫臣法敏謹

奏竊臣於本年正月初四日自武昌府起程赴川到任沿途所過湖北荊州彝陵等處因去年臘月連得大雪二麥發生甚茂至川屬夔州重慶成都等處因冬春雨雪及時麥甚暢茂凡臣所至之處見軍民人等俱各歡欣樂業蓋從前川省每多加徵私派苦累民間我

皇上軫念閭閻澄清吏治嚴行革除故軍民咸得受福無不感頌

天恩再查川省米價鹽價俱賤居民易於度日土著之人  
大率淳良風俗儉樸但本省人甚少而外省附籍者居多  
未免多事健訟然亦不過田土戶婚偷竊等事至於命盜  
案件向來稀少也臣道途所見以及訪聞情形謹具摺奏

聞謹

奏

知道了惟以無欺隱為務切記實力奉行為至要之言



同日又

奏為奏明事臣查川省地廣事繁土苗雜處臣性質

愚鈍時恐隕越不勝凜懼惟有竭盡心力逐件詳  
加核實有應題者具

題應奏者摺

奏仰懇

皇上念巖疆重地時

諸事須據實敷奏臣方臣可詳細指示若稍涉掩覆臣便  
賜指示訓誨俾臣得有遵守則地方幸甚臣亦幸甚又

訓諭

臣亦不切中利弊何益之有

欽奉

硃批諭旨發到前撫臣王景灝覆奏丘形號數人丁戶  
此事當再三詳審不可欲速凡百與程如絲商酌仍須  
自立主見則庶幾萬全矣  
於地方百姓均有裨益再行具

奏臣謹一併奏

聞謹

奏

爾此任實所繫匪輕於內外無事時已屬緊要倘遇有

事責任更重當日夜兢兢預為籌畫以防備意外方不負朕倚任之重也勉之勉之

同日又

奏為奏明事

臣

查川省土司番蠻苗夷非比內地人

民馴良畏法兼且有漢姦播弄生事亦有沿邊弁員需索擾累致生事端者又有仇殺搶擄世相報復者若該管文武果能共矢清正無一毫苟得之念彼必心服知所畏懼臣現今通行嚴飭務期痛

改積習以安邊境嗣後遇有伊等互為報復自相  
擄劫等事令各營衛為之宣諭排解若竊掠內地  
人畜等項檄令該頭目獻出犯人以憑審明照苗  
民例處斷如有侵犯內地干法犯紀等事臣一面  
會同提臣計議擒捕一面奏

聞總期邊境安戢不致滋事以仰副我

皇上綏靖苗疆之至意謹

奏

凡關苗夷之事岳鍾琪深為練達必推誠會商共相斟酌而行若事在緊急又當一論觀程如絲於此等處似不甚洞徹周瑛頗覺熟諳然識見平常惟岳鍾琪穩當而得大體朕意凡屬番夷苗獠雜處省分若能使文武弁員清正自持絲毫不取小利於彼可保無一事也是乃探本尋源上策當竭力勉此

雍正四年四月二十六日四川巡撫臣法敏謹

奏臣查川省邊界番蠻土夷種類不一其性皆非馴

現今冤山烏蒙等事悉照依岳鍾琪鄂爾泰所咨移而  
良但從前南坪冤山等案或係苗蠻干犯法紀或  
行若少掣肘致悞機宜干係爾之身家性命也慎之慎  
係沿邊員弁需索生事所致臣以為撫馭之道貴  
之

爾之才識平常何可遽作如此議論殊不自揣岳鍾琪  
徒事羈縻不為懲一儆百終難戢寧邊境如番蠻  
深悉夷情斷不至有過不及處且爾甫經到任尚未周  
知地方事宜遂為此未見顏色之瞽論耶不過據一二  
督提鎮一面奏

屬員之書生管見即率爾道聽塗說公然具摺上奏殊  
聞一面相機擒拏務必明正其罪以彰

屬孟浪妄謬之至

國法使遠近番夷畏威守法至川屬軍民等府以及

界連土司之州縣衛所文職往往呼應不靈而彈  
文職武職有何分別

壓稽查每事大率以武職為主從前各員弁循習

陋弊或發賤價勒買人畜土物或以內地布米等  
文職能免此等事乎

項賤買貴賣責令交易或借追贓拏賊名目派取

供應恣意需索以致夷民難堪往往因此滋事我

皇上德洋恩溥一視同仁所在員弁宜皆欽承

聖意於所屬土司既當示以威嚴尤當將以德意開誠  
自應嚴飭其威德兩用懲獎並施但止可論優劣如何  
布公懲惡獎善庶使夷衆悅服邊境安寧但防微

分文

武耶若文職則漫無訪察可乎

杜漸以期永遠綏靖又似有不可不預為籌慮者

軍功

如近邊各員弁遇事不查其是非曲直從公科斷  
議叙從捨死忘生中來爾若能捨命立功然後可  
仍存偏袒苟且之念甚至僥倖軍功議叙遂生喜

發此

論何言不量情一至於此  
功好事之心或至激成事端在

觀爾

已中爾屬員書生迂濶之病恐悞大事朕甚憂之  
國法既不容置之不問而勞師動衆糜費不貲且未

若不能

辨別屬員欺騙之言何克當統轄全省之任莫  
免釀成大案戕殺多人殊非我

被人愚

四字當時以自警  
皇上如天好生之德矣

臣查閱案件此雖未有確據而

實為邊方隱憂臣雖經移咨提鎮并嚴飭近邊管



土各官務以安戢邊境為主不得一毫苟且以致

開釁生事但必得欽承

殊屬妄謬之至此不達時務屈抑下情之論朕實不能出諸口

天語嚴飭督撫提鎮共相約束庶沿邊弁員皆知所凜  
遵而邊境賴以永寧矣是否允協伏乞

皇上睿鑒施行謹

奏

治內地當先寬而劑之以嚴治邊夷宜先威而繼之以  
恩方克有濟朕非好大喜功偏於殘忍之主此數處番

夷咸沐

聖祖數十年寬仁厚德自應傾心向化總緣地方官不實  
心任事苛求見小激出事端復隱匿養姦致令伊等恩  
不知感威不知畏所以大不法之案重見疊出今若照  
爾迂見而行爾能令所屬各員盡皆一塵不染乎倘再  
有不法事出將不肖員弁正法以謝罪於番夷乎抑別  
有料理之法乎爾試言之若漫然不料事之始終亦並  
無深謀遠慮止據目下一二人無稽之迂談奉為指歸

信而不疑是豈封疆大臣之識見也今爾所見亦不可謂全無用處但尚非其時俟將此歷來不法之積習極力振作整頓一番使伊等凜然知法當遵知威可畏然後再行爾此奏嚴飭將弁屬員遵守弗違彼時可保地方百姓永遠享昇平之福也此固一勞永逸之策當另為熟籌目下似此姑容將就夫吾塘塞之居心行事朕甚不取當悉聽岳鍾琪潘之善等主見而行爾既不達向來情形不得一毫固執已見朕閱爾此摺甚為心煩

而增憂慮何也通盤主意全然不合機宜倘至臨期掣肘悞事朕命爾撫川朕之過亦難以解免矣為此特諭將此諭密與佛喜程如絲三人同看不可再令一人知之

同日又

奏臣查川省地方仰賴

皇上福庇雨暘時若今當二麥漸次收割之時各屬約計俱有八九分收成所種菜花十分豐盛至於蠶

桑處所因晴暖及時皆倍獲其利人民樂業俱各  
歡忭共慶昇平臣謹據實奏

聞仰慰

聖懷謹

奏

爾到任未幾若妄意以為自所感召而致者則謬矣

同日又

奏臣查四川學院向例新進各生每人呈送學臣摺

見儀十兩十二兩不等約計通省學臣一任有三萬餘金相沿已久士子皆所樂從則學臣除養廉之外儘有贏餘而各州縣又每於學臣按臨考試之時派取民間供應責之里下胥役人等不免從中需索侵蝕輾轉滋弊甚屬累民臣不避嫌怨通飭各屬嚴行永禁至學臣任蘭枝校士公明聲名好各屬士民以為從前歷任所不及理合一併奏

聞謹

奏

似此小事輒為不避嫌怨之語足見怯懦無能奈何奈何殊屬可笑之至若如此逢人逢事縮手縮脚畏首畏尾地方上一事豈能辦理耶

同日又

奏為查明覆奏仰祈

睿鑒事竊照前撫臣王景灝覆奏川省坵形號數人丁戶口一摺欽奉

硃批此內有條奏者朕發與王景灝議奏之事不知妄  
否爾再斟酌具奏欽此臣查川省自遭獻賊兵  
燹之後土曠人稀地方各官惟患民寡遂有報糧  
升合而占地數畝者界限遼濶田多荒蕪是以前  
後屢奉

旨招徠民人填實地方川省遂大半皆秦楚之民雜處  
因而欺隱侵奪爭告無已今若設立坵形號單給  
與執照誠可永杜爭端但全川田地惟近省數州



縣為平疇沃壤其餘皆屬高山峻嶺密菁深溝犬  
牙相錯荒熟相間今欲倣照江浙魚鱗冊法分別  
本名田地繪圖造冊編號非逐一履畝清丈不可  
而道路險仄一州縣之地非經年累月不得清晰  
是以前撫臣王景灝摺

奏有非日月可計容臣折衷至當徐徐奏

聞之語也臣荷蒙

聖明垂詢敢不悉心籌畫惟是川省幅輳遼濶接近番

蠻按形編號言之甚易而行之甚難查川省開墾之田從前部議准令百姓自行首報增糧如有不肖官員藉此擾累督撫即行題叅奉

旨依議欽遵在案近年以來據各州縣陸續首報賦稅正在漸增之時臣現在嚴飭各屬諭令紳衿兵民將已墾熟田據實首報毋得隱漏其荒蕪之地務必實力勸民開墾毋使閒廢再川省控告呈詞為侵佔田土者居多嗣後莫若因其控告即行查明

有指證者令各州縣務必親行勘明清丈有隱匿之熟田仍押令遵示首明其霸占之荒田俱令退出另招開墾照例起科按畝承糧因遂給發清單開明坵形編定號數各付執照庶欺隱霸占之田漸清而

國賦日增訟端自息民不驚擾矣至條奏內欲另行清查編定戶口人丁可以徵繁庶且易於行保甲其說甚善但臣入境以來沿途留心查看川民多

散處於山陬江汜其流寓無業之民行踪不定故保甲之法向亦止存奉行之名臣今現在嚴飭各府州縣衛所於城市關廂人煙湊集之處以及可以聯絡之村莊鄉鎮俱編設十家牌實力奉行保甲之法至於孤僻四散之處檄令所在弁兵勤加游巡不時稽查以期弭盜安民若照編定丁冊以行保甲則人民散處勢難聯絡必仍有名無實徒成紙上空言伏惟

皇上御極以來勤恤民隱無時不  
朕所交事情不行悉心詳議將此等閒話寫來煩瀆爾  
念切閭閻無事不詳求允協而且  
意何居

聖德如天凡關係民生裨益地方之事無不因革得宜

至周至備偶遇災傷蠲免動輒數百萬兩

既用臣等二字即當列名某某

深仁厚澤無遠弗屆今令臣等再三斟酌者實為川省  
石則或聲明曾與某某商酌今摺中並無此語可謂疎  
侵奪訐告之風不可不除而安民弭盜之法不可  
忽之極

不講也臣身在地方細加查訪民情土俗所聞見

者不敢不一一據實

奏明再川省人民向有私派之累近雖嚴行革除而

忽東

一句忽西一句詞甚支離實令人不解

頻年以來借軍需之故派累甚多今正宜仰叨

皇上洪恩專務休養生息寬民之力使其安居樂業共  
享太平之福庶不負

皇上宵旰勤求治理之

聖心也臣謹據實

奏明是否允協伏祈

睿鑒指示欽遵謹

奏

覽此奏與所條奏之處了不相涉朕原令爾徐徐斟酌  
妥當然後奏聞並未催迫爾如暫時未得確當主見即  
稍遲時日何妨今為此一派支吾搪塞之語含糊亂書  
一篇終歸之於頌聖革除派累而乃落是否允協四字  
祈朕指示殊屬可笑之極與佛喜程如絲再加詳議具  
奏

雍正四年六月初四日四川巡撫臣法敏謹

奏為奏

聞事竊臣奉

命移撫四川巖疆重任實切凜懼惟有仰體

皇上察吏安民之至意正已率屬一念不敢自懈每接

見屬員諄切誠勉諭以實心任事愛養百姓以仰

答

莫被人愚感發願做好官面受朕訓諭之大臣中能有  
皇上勵精圖治期望大小臣工共為良臣之  
幾人況爾勸誡此數微員乎爾今所居之任乃為闔省  
聖恩反覆開導各員頗有感慨願為好官之意現在不



人所愚時查訪所賦誑之地也不可不慎之慎者即據實參  
訪此四字甚好萬不可信人萬不可疑人只此二語用  
奏至於地方利弊臣逐一詳求漸次興革以期稍盡  
人之道備矣  
職守所有已行事宜謹臚列為我  
此下逐條批諭論事中不得其人之弊耳不謂汝禁約  
皇上陳之  
之非也

一有司私派害民實甚川省積習相沿不以為異

近雖禁革或恐有陽奉陰違者自必陽奉陰違何云或恐臣復行頒示嚴禁

不知爾遣何等入密行查訪不過為此人之美差耳并現在密行查訪如有借稱公費名色及上司差

遣等項向里下需索私派者定即究參

用大戕便能禁若用小戕加收則更甚矣  
一加徵重耗向有例禁乃川省有私置合頭大戕

暗取加耗苦累花戶刻剝小民者臣亦嚴行禁革  
如第一條

如有違犯一經訪實立即嚴叅

一佐貳官定例不許擅受民詞而川省雜職微員  
每有違例受詞者甚或教官亦干預民事以至任

意需索是非顛倒深為民害臣已嚴行示禁如有  
正印官若不肖小民無處申訴矣

違者即令正印官揭報叅處

一川屬地接各省並連土司有等網利姦徒糾合

黨羽在於山箐僻靜處所見有往來男婦或樵採  
此亦不過如盜案耳盜賊盡除朕方保此風可息  
兒女擅行綁掠隨處販賣惡習成風殊可痛恨臣

絕掠賣之源固當但恐與查拏者又添一生意也  
出示嚴禁又通行各屬嚴加查拏并曉諭紳士軍  
民不得擅買來歷不明之人以絕其源庶掠賣之

風可息矣

一川省向有扛搶之風無論民間處女再醮動稱  
倘其中真屬許配誤為扛搶或致冤抑平人若令查拏  
許配在先硬媒硬證糾黨成羣任意扛搶或致釀  
之人臨時分別又恐此輩高下其手刁風未必能永絕  
成人命最為惡習臣一面示禁仍通行各屬嚴加

也

查拏務使刁風永絕

一差役辦公原不可少有姦惡之徒一奉官票

衙官優劣不等作弊亦無一定勒石未必能禁恐由此

名擅赴鄉村擾累百姓任意需索為害實甚臣已

啟百姓挾制官長之風通行嚴飭并令勒石永禁

此不過招一川省凡童生赴考每向里下索取供給生員入

令士闡亦於地方索花紅路費州縣等官每自謂作養

斯文子默懷怨望於朕州縣則更獲作養斯文之名若不行禁止此實陋弊豈可因循苦累百姓臣

再將花紅路費分送州縣一半則州縣更踴躍作養斯  
仰體

文矣

皇上恤士愛民之意通行嚴禁現在訪查如有故違即

當拏究以絕銅弊

以上逐條批諭不過言好事中原本有此不好處以開拓  
以上各條係臣到任後訪查民風土俗酌量舉行  
爾之識見所訓爾者惟當察吏為求治之根本耳切毋  
輕信屬員之愚惑實力勤慎為之

奏伏祈

皇上睿鑒謹

奏

以上數條可謂是當之至但言之最可聽行之最為難  
頒約易禁止難道府州縣諸如此類詳覆爾之文書萬  
不可信其必能行所言也此七條內若能實力舉行一  
事爾之造福於川省無量矣地方遼濶焉得處處期其  
奉行必力自古有治人無治法爾等封疆大吏但以秉  
公察吏為主如爾今舉行此數事緩則弊在因循日久  
漸至懈弛急則患在騷擾苟免一時譴責能不受屬員  
之種種欺隱蒙蔽莫作容易看惟宜勉之慎之盡爾一

已力量殫心竭慮督察訪詢或有益於萬一不然徒費唇舌虛張告示於地方何實濟之有須實力勉行徐徐權宜為之母忽

同日又

奏竊查川省係極邊巖疆各處城垣關係最為緊要臣到任後即通行各屬據實繪圖造報雖尚未據查覆而臣細加訪問完固之處十無一二沿邊各屬不但無以資捍禦且亦無以昭制度若欲槩行

興築工費浩繁事非易舉而聽其因循殊非保衛  
邊方之計查各屬鹽茶稅課銀兩除正額及繳送  
各衙門規禮外其中尚有羨餘近准部文各關俱  
令儘收儘報但若全數報出作為定額恐鹽茶或  
因天時水旱出產難定一時接濟不及將來勢必  
貽害商民若不報出則又徒為官吏分肥莫若令  
兩司查明酌存各官養廉將所餘銀兩儘其多寡  
亦令解交藩庫俟蓄積一二年查川省城垣內擇



其最緊要之處委令大員確估具摺

奏明修築次第整理似亦鞏固邊圉之一策也是否

可行伏祈

皇上睿鑒指示欽遵謹

奏

此非應摺奏之事儘收儘報權在爾等督撫但有干係  
耳若如此密奏了結無憑察核則無干係矣烏乎可

同日又

奏為奏

聞事竊臣於五月二十五日准到督臣岳鍾琪咨稱冕  
山營所屬賊蠻金格等狂悖因從前各案並未殲  
其兇首致無忌憚今乘其秋糧將熟宜行勦撫已  
行調土兵漢兵各一千五百名務在六月內齊赴  
冕山駐劄令該鎮趙儒統領并調化林副將張成  
隆協同料理脅以兵威再行化誨如仍抗違不遵  
聽該鎮會同臣一面奏

聞一面進勦等因并咨臣將應需口糧照例備辦支給  
臣隨飛檄布政司會同建昌道星夜備辦輓運支給  
又准署提臣潘之善咨官兵預支俸餉以資出  
師前進臣行司查議官兵內地行走定例不支口  
糧若不稍為通融借支兵餉官兵勢必拮据應酌  
量預支接濟俟秋冬二季領餉時照數扣還再查  
土兵在口內行走一切口糧及犒賞之需從前俱  
於軍需羨餘銀內動支今次土兵調赴冕山計程

甚遠伊等自備口糧裹帶有限自應支給口糧接濟其輓運支給之處容俟另疏

奏明外至犒賞一項勢不可少臣於應得銀兩內動支備辦銀牌牛酒等項隨時犒賞并檄委建昌道率領各州縣分頭管理諸事皆已就緒俟官兵齊集後臨時相度機宜應勦應撫臣就近同提鎮二臣會商妥協再行奏

聞務期邊方寧謐以仰慰

聖懷所有臣現在辦理緣由合行陳明謹

奏

極宜加意鼓勵兵弁督率屬員竭力料理若少掣肘貽誤機宜罪歸於汝也

同日又

奏臣查川省從前辦理軍務及一切公事凡有費用難入正項銷算者俱在浮冒軍需及私派銀兩內動用於中扣剋中飽者居多今各項私派盡行禁

革一應軍需俱從實開銷此外若有公務費用實無可動之項但川省崇山密箐番夷環繞出沒不常其一切防禦事宜有不可不預為籌畫者若不稍為變通萬一事出意外必至掣肘貽悞非輕臣查川省收稅各員及布按兩司俱有繳送巡撫衙門規禮共計五萬一千餘兩內除夔關銀兩題充正項并松茂道糧規題請折改歸併藩司該道無從交送外每年共計存銀三萬六千餘兩巡撫衙

門控制全川一切差遣賞需等項原有不可已者  
非別省巡撫可比臣請

賞留一萬二千兩以充一切費用餘銀二萬四千兩交  
與藩庫收貯留充本省公用仍令該司登簿季報  
以憑查考如此則地方公事不致有悞巡撫衙門  
一切事件皆仰叨

聖恩易於辦理矣謹

奏

爾等督撫之貪廉不在於此惟務實行朕自能周知全不在章奏語言間也

雍正四年六月二十日四川巡撫臣法敏謹

奏竊臣於六月十八日接到欽奉

硃批各奏摺臣跪讀之下如夢初覺自知謬誤不勝戰慄恐懼無地自容叨蒙

天恩不即嚴加重罪猶

賜訓誡臣不覺感激涕零惟有敬奉



聖訓痛自刻責諸凡虛心商酌力求自新以期稍蓋前愆至冕山用兵事宜臣一准督臣岳鍾琪咨立即會同署提臣潘之善及布按二司等商酌辦理今漢土各兵皆已起程赴冕矣臣跪讀

聖訓憂懼惶悚寢食俱廢謹繕摺具

奏倘得

聖心稍為寬慰則臣犬馬私情實為萬幸臣不勝感悔  
激切之至謹

奏

觀爾於一切奉旨賞幫兵弁之處甚屬不及若於此等處施小作用冀朕信汝清廉則大悞矣此番軍需賞勞倘少涉慳吝不能鼓勵將士不能得土兵感悅之心朕不汝輕貸也

雍正四年九月十七日四川巡撫臣法敏謹

奏為恭繳

硃批奏摺事竊臣奉到

硃批各奏摺荷蒙

聖恩詳加指摘委曲開導

訓誨諄諄臣跪讀之下做惕感激惟有時刻勉勵竭盡  
心力以圖仰報

高深於萬一所有臣奏摺十一件皆欽奉

硃批理合恭繳為此謹

奏

知道了已調爾巡撫陝西矣勉為之

雍正四年十一月初二日四川巡撫臣法敏謹

奏竊照浙江撫臣李衛

奏明動銀十萬兩委員赴川買米臣准部咨隨即檄

行布政司詳委能員於重慶夔州二府候浙省委

員一到協同辦理採買并出示嚴禁不許姦牙囤

積高擡價值令地方官互相稽查務使米價平允

易於購買催令速運不致阻滯斷不敢以隔省岐

視今浙省委員尚未據報到川俟購買完足之日

再行奏

聞為此謹

奏

甚好爾等同受倚任皆係為朕守封疆之臣須一例看  
視不分彼此方是

同日又

奏為奏明事竊查督臣岳鍾琪摺

奏勦撫賊蠻金格等一案臣准咨之日即傳司道等

會同面議所調漢土官兵師行糧從務期士馬飽騰

國帑不致糜費必從長籌畫方克有濟隨據建昌道劉應鼎稟稱查打箭爐口外至拉里原設塘站捐駝馬匹自用兵以來歷年陸續倒斃各塘站不即買補所領草乾銀兩除餵養現存馬匹雇夫工價外每年俱有支剩銀兩從前俱入在餘銀內雜費惟有雍正二三兩年額領銀兩實支夫馬工料外

支剩銀一萬七千二十五兩零此項銀兩前道未  
入餘銀之內今用兵之際莫若將此項銀兩為各  
官兵口糧軍需之費似屬以公濟公俟事竣

題明等語復據按察使程如絲稟覆相同據此臣隨  
即分委各官備辦公支在案但今准提臣周瑛准  
建昌鎮臣趙儒咨稱賊蠻等逃入深箐號召黨羽  
猖獗益甚因復調漢土官兵二千二百名連前共  
官兵五千有餘臣思兵益加增糧亦加多自六月

至今為日已久前項銀兩必不敷用且冕地山深  
箐密風寒水冷原與口外無異是以據司道詳請

題明請

旨將前次給過口糧及今調官兵銀糧一併開銷正項  
其兩年塘站支剩銀兩請作軍前一切不便開銷  
之雜項使用俟擒獲賊蠻撤兵之日核實具

奏如有剩銀仍存道庫除將口糧等項另疏

題明外所有雍正二三兩年口外塘站支剩草乾銀



兩作為軍前雜用是否允協伏候

睿裁謹

奏

好知道了官兵口糧照出口例免其扣除已有旨矣

雍正四年十二月二十七日陝西巡撫臣法敏謹

奏為奏明事竊臣自十二月初三日自成都起程初

九日至昭化縣途遇督臣云今冬雨雪霑足可卜

來年豐稔十六日行至漢中府鳳縣時值大雪積

深六七寸隨於經過之鳳翔西安各州縣地方詳  
加訪問俱稱自十一月至十二月屢降大雪有積  
至尺餘者及臣到署又查延安府屬州縣報文亦  
於十一月內各得雪至八九寸是西安所屬四府  
得雪普遍四野霑足此皆我

皇上宵旰勤勞實心愛民感召

天和之所致也為此謹

奏

覽奏深慰朕懷

雍正五年三月十二日陝西巡撫臣法敏謹

奏為仰承

聖訓恭謝

天恩事雍正五年正月十二日接到雲貴督臣鄂爾泰

來書內錄

皇上硃批臣跪讀之下不勝惶悚涕零竊臣至愚極陋

蒙

皇上天恩擢任封疆時虞蚊負幸荷

聖明備加訓誨俾有遵循得免隕越今於督臣鄂爾泰

奏摺內

特降諭旨曲賜開導勉勵造就不啻家人父子臣何人

斯疊受

聖主天高地厚有加無已之

洪恩如此至優極渥也惟有仰遵

聖訓時時奮勵刻刻警惕一切關係吏治民生之事務

期殫心竭力克盡愚誠以圖仰報

皇上生成教誨之

隆恩於萬一耳謹將督臣鄂爾泰原書一併恭呈

御覽謹

奏

朕向日從不留心人情世務今即位四五年以來頗閱  
歷人情見知過改悔者甚少誠所謂秉性難移下愚之  
流雖聖人亦末如之何也聖門最重改過不吝覺悟自

非捨己從人為天下極難之事莫看作容易朕勸導內外臣工同心合德君臣共相懋勉以仰答

聖祖數十年教育深恩亦可謂竭盡心力矣能仰體朕心者自然悠久蒙福如必不聽從則必至於擯棄臨期噬臍何及若能慎守所長勤修所短琢磨成一全材報效國家利益生民豈不美歟倘甘心庸碌自居尸位素餐孜孜焉止為一己計恐今日之大臣中上蒼未必容此等居心人也勉之勉之

同日又

奏為奏

聞事查得西安八旗滿兵及督撫兩標城守營綠旗兵  
丁本年連閏應支粟米共一十七萬一千五百五  
十七石零除將現在米石儘數支放外尚不敷米  
六萬九千六百五十八石零曾經

題明照部定折價支給在案查現存之米止可支放  
至九月自十月至十二月俱支折價

臣訪聞得往

年兵丁支米之月將食用所餘之米即行糶賣無存遇折價之月齊赴糶買以致市價高昂兵民皆有米貴之虞臣是以飭令署糧道詳加確議並商之將軍臣延信等自三月起至歲底止將各兵應支銀米通融均搭每月銀米兼放則兵丁食米既無缺乏而市價亦得均平實與兵民大有裨益臣已檄行該署道查明分搭支放矣理合奏

聞謹



奏

即實係如此情形亦當奏明再行不應一面分搭支放  
假若因本色不足巧為騰挪則爾將來領罪不起此事  
曾與岳鍾琪商酌過否

雍正五年閏三月初九日陝西巡撫

臣法敏謹

奏為甘霖普遍仰慰

聖懷事竊照西安自去冬以及正二月雨雪霑足麥苗  
茂盛倍常惟三月間雨澤稀少輿情仰望甚殷今

於閏三月初三四五等日甘霖疊沛據西安鳳翔  
二府屬及直隸同州華州并所屬各報得雨相同  
除延安漢中二府離省稍遠尚未報到初七日復  
降時雨今西安附近各州縣俱已十分霑足二麥  
豐收可必臣喜聞萬姓歡呼實為地方慶幸謹將  
得雨霑足情形繕摺奏

聞恭慰

聖懷謹

奏

覽雨澤情形深慰朕懷

雍正五年閏三月二十一日陝西巡撫臣法敏謹

奏為恭繳

硃批奏摺事竊臣奉到

硃批各奏摺內恭請

聖安摺臣敬謹收藏至復荷

聖慈諄諄教誨臣惟有銘心刻骨凜惕祇遵外其餘奏

摺四件皆欽奉

硃批理合恭繳為此謹

奏

將向來得力之舊習一切障礙業識豁然醒悟洗滌改  
革非易事也勉之

同日又

奏為首郡要缺仰懇

聖恩速賜揀補事竊查西安一府地居省會旗民雜處

所轄屬縣錢糧繁重且承審承查案件較之他郡  
倍多必得操守廉潔精明強幹之員方克勝任前  
任西安府知府潘霖鼎病故經臣

題報在案現今乏員伏乞

皇上於記名人員內揀選一人速令赴任庶地方一切  
刑名錢穀咸資料理臣得收臂指之效矣為此謹  
奏

新守勝任與否試驗後具摺奏聞

雍正五年五月十一日陝西巡撫臣法敏謹

奏為恭報二麥收成事竊照陝西目下二麥豌豆菜  
子俱已刈獲惟延安一府及直隸鄜州葭州綏德  
州地氣寒冷收成稍遲尚未報到俟到日另行具  
奏外今據布政司彙報西安鳳翔二府收成俱有十  
分九分漢中府收成共八分九分直隸興安州商  
州同州華州乾州邠州耀州收成俱六分至十分  
不等地方豐稔民生樂業再二麥收穫已畢正在

播種秋穀急需雨澤之時茲於四月二十七八九  
及五月初四五等日連降時雨四境普徧均各霑  
足合併奏

聞謹

奏

朕以手加額欣慶覽之

同日又

奏為請

旨事竊查積貯實

國家之大計民命之攸關西安省屬現貯倉糧共計有七十二萬九千餘石可謂有備無患矣但虞其間或有州縣造報不實掩飾一時者除現在檄委道員等親赴各州縣徹底盤查據實出結詳報外惟是各屬所貯糧石有米麥豆穀色樣不一究其所由或因年成歉薄聽從民便照現在成熟之糧色徵收者或因賠補虧空視地方出產之多暫時



通變者亦有出借於民急欲完補不拘色樣任民

失之於前係前任之咎不必言矣因循於後則汝等難通融完納者日積月累漸與報部色樣不符矣此

辭其咎應清與否在汝等審量功過自為之而已朕不從前相沿之積習也第既失之於前豈可因循於

強諭後若不即為清理將來色樣混淆必至難以稽查

總督臣再四思維行司查議據布政使張廷棟通詳督

穀乃臣岳鍾琪已批候陝撫示行在案臣查豆非民食

具詳急需固不如米麥為適用而米麥易於霉爛又不

若穀之更可耐久莫若將米麥豆徹底查明統易

欽定四庫全書

原書  
卷五十一

易穀

存貯原係極好之事應如此但須題明

為穀既便於久貯而於備荒平糶均有裨益再查

米麥豆通省合計約有十之六七倘一時糶賣糶

穀必至穀價騰貴於民又有不便請於每年二三

月間於存七糶三之時將米麥豆均勻搭糶至秋

成後每米麥豆一石易穀二石貯倉則三年之內

盡易為新穀庶緩急有備浥爛無虞矣是否可行

伏乞

皇上睿鑒批示以便繕本具

題為此謹

奏

據奏稱米麥豆通省約有十之六七須詳查其數某州若干某縣若干初年清理幾何次年易補多少亦須登記若似此含糊具奏大有因循歲月藉端諉延之意不過畏朕耳目照察預防差人盤查之巧計耳倉穀之清理與否目今直隸江西皆榜樣也力行與不力行在爾等自為之總之直省槩須清理一遍但得人朕即差往

若似法敏一類之人朕豈肯令膺此等任怨之差遣耶  
勉為之慎思之

同日又

奏為恭繳

硃批奏摺事竊臣奉到

硃批各奏摺內恭請

聖安摺臣敬謹收藏至疊荷

朕之不棄豈可恃耶須汝不自棄方好  
聖主高厚弘慈不棄駑鈍

茅塞之開豈所易言勉之勉之非實實痛自刻責斷不  
訓誨諄切開臣茅塞臣惟有痛加洗滌猛自警省夙夜  
能猛然警省胸中主宰不明雖強欲凜遵恐終屬難能  
凜遵以期仰報也

皇恩於鴻中所有奏摺五件皆欽奉

硃批理會奏繳謹

奏

覽

硃批諭旨卷五十一